

Close to Home



Te kōrero mō Josh – he haerenga ki te tautoko i ētahi atu



Josh outside his home in Christchurch.

I tētahi wā tino uaua o tōna oranga, mahue ia te whakaaro anake ki tōna ake haere, i whakaaro kē a Josh me pēhea e āwhina ia i ētahi atu i āhua rite nei tō rātou āhuatanga ki tōna.

I a ia 18 tau te pakeke, i pararūtiki a Josh nō Ōtautahi (e 25 ōna tau ināiane) i muri i te pānga ki tōna aho tuaiwi o tētahi mate pūnaha ārai ake tino rerekē ka huaina nei ko te mōwhitiwhiti kōaro (transverse myelitis). I muri i te marama kotahi

ki ICU, e 5 ngā marama anō i pau i a ia ki te Burwood Spinal Unit i Ōtautahi e maimoatia ana – ā, ko reira ia ka whakaaro kia whakamahi i tōna ake wheako hei āwhina i ētahi atu tūroro mate tuaiwi.

“I tīmata au hei kaitūao [mā te New Zealand Spinal Trust i te Hōhipera o Burwood] i ahau i te hōhipera tonu, he hiahia nōku ki te hoki mai, i te mutunga iho, kāore ahau i wehe atu – i puta au i te hōhipera me te whai mahi,” ka kata a Josh.

Ināiane kei te mahi wā-hamanga mā te New Zealand Spinal Trust a Josh hei kaimahi tautoko hoa, e tautoko ana i ngā tūroro e ora ana me tētahi hauātanga aho tuaiwi.

“Ko te nuinga o te mahi he whakamārama i ngā kōrero a ngā rata me te rōpū o te hōhipera, he āwhina i ngā tūroro ki te urutau me te ako i ētahi tikanga kāore e taea e te hōhipera te whakaako, pērā i te pana kāta i te hokomaha, te tari kapu kawhe rānei i te papamahi ki te hāneanea,” e kī ana ia.

I hūnuku a Josh, e pupuri nei i ngā mahi wā-hamanga e rua anō hei kaiāpai mō te hunga whai hauātanga, ki tētahi whare moemanga-tahi, kōrea-pai o Kāinga Ora e 3 marama ki muri – kei te tōnui hoki i roto i tōna kāinga hōu.

KA HAERE TONU I TE WHĀRANGI 02



HAERE AKE I TE WHĀRANGI 01

Te kōrero mō Josh – he haerenga ki te tautoko i ētahi atu

“Tēnei tōku wāhi me te wāteatanga ki te pupuri anō i te mana mō tōku ao. Ko te āhei ki te hoki mai ki tētahi whare kua tangohia atu aua raru katoa [o te tomokanga] he whakawāteatanga tonu.

“Ka tiki au i tāku kawhe i te Rātapu, ā, ka tata hoki ki Kmart. E 5 meneti noa iho te tawhiti o ngā mea katoa e hiahia ana au, ā, huri i te piko ka eke au i te pahi ki te mahi – he rawe.”

Hei tino ‘tangata aroha ki te tāngata’ ia me te ngākau whiwhita ki te hāpai i te hunga whai hauātanga, tē taea te whakakāhore he tangata miharo a Josh. Engari he aha te mea kei te akiaki i a ia?



Kei te mōhio au i pēhea te whiwhi ki te tautoko i a au e tūroro ana, me te mōhio ki tōna pānga ki ahau ake, nā reira ko te akiaki mōku ko te hiahia ki te tuku anō i tērā ki tētahi atu. Kaua e huri i te ao katoa, engari ka taea e koe te huri i te ao o te tangata kotahi.”

Josh



Mātakitakitia tā mātou ataata o te kōrero katoa mō Josh i tā mātou pae tukutuku – [kainga.govt.nz](https://www.kainga.govt.nz).

He pānui mō ngā whakahōu kāinga ora



He mea hira kia mahana, kia maroke, kia hauora tōu whare mō koutou ko tō whānau. Ko tōna tikanga, i tēnei wā, i tērā wā, me tomo mātou ki tōu whare mō ngā mahi tiaki, whakatikatika, whakapai rānei.

Mō konei tā mātou hiahia ki tōu āwhina! Ki te whakapā atu tōu kaiwhakahaere tautoko whare, tētahi rānei o ā mātou kaikirimana ki te whakarite ki te toro atu, mahi tahi me ia kia whakaritea tēnā. E hiahia ana mātou kia māmā rawa mō kōutou ko tō whānau, nā reira ki te wawe tā mātou urunga ki tōu whare, ka oti wawe ngā mahi.

E mōhio ana mātou, i ēnei wā rerekē o te COVID-19, e whakamātau ana tātou katoa te tiaki kia haumaruru te whānau, nā reira kei te mārara mai tōu āwangawanga mō ngā kaimahi i tōu whare. Me noho taratahi pea koe i roto i tōu whare i ētahi wā.



Ka mahi tahi mātou me koe me ā mātou kaikirimana hoki kia noho mātāmua tō hauora, tō haumaruru hoki ina mahia ētahi mahi.

Ka whai hua ngā kāinga ora

Kei te mōhio kē pea koe me āta titiro ka tutuki i ngā whare katoa o Kāinga Ora ngā paerewa kāinga ora a te kāwanatanga tae rawa ki te 1 o Hōngongoi 2023. Arā, me toro e mātou o mātou whare katoa kia tirohia:

- te pūnaha whakamahana
- te ārai makariri – i te tuanui, i raro i te whare hoki
- te putanga mai/atu o te hau
- ngā manga
- ngā tohu o te haukū
- ngā kauanu ka rangona.

Ina hiahia kia tirohia e Kāinga Ora ēnei mea i tōu whare, ka whakapā atu tētahi o ā mātou kaikirimana ki te whakarite i te wā e toro ai ia. Ka mutu tāna tiroiro haere, ka kōrerotia ki a koe ngā mea me mahi, āwhea anō e hoki mai tētahi tangata ki te whakaoti i ngā mahi. He mea hira tonu kia āhei ā mātou kaikirimana te uru ki tōu whare ki te mahi i ngā mahi. Whakapā atu ki tōu kaiwhakahaere tautoko whare ki te mea he āwangawanga, he pātai rānei āu.

Ngā mihi mō te mahi tahi me mātou ki te whakarato kāinga ora mō koutou ko tō whānau.



Kei te koa a Heretaunga i te whanaketanga o Kauri Place



Te Pirimia a Jacinda Ardern e tūtaki ana ki ngā kainoho o Kauri Place a Marie rāua ko Fred.

Ka mumura ngā kanohi o te tokorua kiritaki nō Heretaunga i te koa o te whiwhinga kāinga hōu e hangā ai ō rāua ao.

Nō muri tata nei i tūtaki a Marie rāua ko Fred ki te Pirimia, a Jacinda Ardern i tāna whakatuwheratanga i tētahi kaupapa hanga whare nui a tātou i oti ki waho o ngā tāone matua o Aotearoa. Kua kī katoa ngā whare e 40 hōu, he mahana, ā, he maroke hoki i Kauri Place, Heretaunga, me te panoni kē i ngā ao o ngā tāngata. Me te hūnukutanga mai o ngā kainoho i roto i te motokā, i te mōtēra, i te karāti me ētahi atu wāhi noho kāore i tōtika, ka āwhina ō rātou kāinga hōu kia titiro whakamua rātou.

He huihuinga ngā whare o ngā papanga tahi, papanga rua, whare takirua hoki, he mea hoahoa mai i te mahinga ngātahi me te iwi me te Kaunihera o Heretaunga kia tipu ai te māramatanga ki ngā take tino hira mō tēnei takiwā kāinga, me te whakamahi i taua mātauranga ki te hanga hapori tōnui ki tōna rahi me tōna tere.

Nō te takiwā kāinga anō te 95% pea o te hunga i mahi ki te wāhi rā, waihangā ana ētahi mahi ki te rohe, whakarato wawetia ana ētahi atu whare hanga-pai.

Ka mahi tahi tonu a Kāinga Ora me ngā iwi, ngā kaunihera, ngā umanga o te haukāinga, ngā hoa pātui hanga whare me te whāinga kotahi – te tuari i ngā rawa me te whakawhanake i tētahi kaupapa whaitake e rite ai te hiahia mō te whare. Ka 600 neke atu ngā whare o te whanaketanga ina oti i te tau 2023.

Ko ngā tae o te whanaketanga he mahinga ngātahi nā ngā māngai o te iwi, te Kura o Hato Mēri me te Kura Tuatahi o Mahora, te Kaunihera o Heretaunga me Kāinga Ora, i hui tahi me ngā kaihoahoa ki te kōwhiri i te huihuinga tae.

I whiwhia he whakaawe i te ingoa tūroa o te ara me te takiwā. Nā ngā tae o te kauri (te kātua, ngā rau me ngā nati) me tōna manuhiri auau te kererū i tohu te ara ki te huihuinga tae reretau i whakamahia ki te whanaketanga. Nā ngā mana whenua hoki i koha te ingoa o tētahi aratomo hou i hangā e te whanaketanga. Ka tohu whakamuri a Ohika Crescent ki te ingoa Māori tawhito mō te whenua i taua takiwā – te Poroka o Ohika.

